

DISCOURS prononcé à la Réunion de la Freirié Prouvençalo à FORCALQUIER

MEIDAMO,
MESSIÉS,
MEI BÉUS AMI DE LA FREIRIÉ PROUVENÇALO,

Es uno astrado benesido que, pèr noueste VI^{me} Coungrès annau, nous acampo vuiei dins la vièio ciéuta countalo de Fourcauquié.

La magnificènci dei fèsto qu'eici nous an alesti e l'acuiènço pretoucanto que l'avèn rescountra nous fan un devé pressant d'adreissa tout d'abord nouéstei coumplimen e nouéstei gramaci subre-tout, lei mai ardènt e lei mai courau, en qu revènon de dre.

Mai perqué fau-ti, pèr un còup de mal-astre, pèr un defalimen de nouesto estello, que lou proumié dei noum mountant de noueste couer recounouissènt ague de nous tira de lagremo? Perqué fau-ti que lou felibre arderous que lou proumié, e despuei de noumbrouseis annado, avié sounja, avié desira de reüni à Fourcauquié la *Freirié Prouvençalo*, ague pas pou scu nous li faire l'acuei freirenau que sa grando amo nous reservavo? Perqué fau-ti que seis uei noum pouescon vuei si pausa sus l'espetacle grandaras que nous es óufert?

Ah! paure Maurel, noueste noble ami, toun amo dèu pamens tresana en aquesto ouro de vèire emé quèntei souin pïous, emé quente gàubi tria, emé quento magnificènci, emé quento religien tei ami e tei fraire an coumprés toun souvèt e l'an coupli!

E d'acò, Meidamo e Messiés, es au municipe de Fourcauquié, es à l'*Escolo deis Aup*, es à l'*Atenèu* que devèn rèndre gràci! Es à M. lou Conse, president dóu Coumitat, que dèu mounta nouesto gratitudo; es à M. lou Dr Bernard, cabiscòu de l'Escolo Aupenco, es à M. lou marqués d'Autane, president de l'Atenèu, es au majourau de Gantèlmi d'Ille, es en tóuti lei membre de la Coumessien, es subre-tout à l'umble pres-fachié que de countùni, sènsò relàmbi, dins l'oumbro quàsi, a douna sa peno e voudrié bessai s'escoundre au-jour d'uei dins un moudèste esfaçamen, à M. Teodor Jullien, vouéli dire, que devèn crida noueste gramaci.

Dins la superbo tiero de bouen prouvençau que formon aquesto assemblado, moun uei dèu destria peréu Mounsegne Castelan, prouvençau de raço e quàsi moun coumpatrioto, pèr li presenta mei respèt.

Lou felibrige a 'gu l'ur, aquest an, de rescountra, siegue à Perpignan, siegue à Fourcauquié, d'evesque patrioto que, sachènt que lei divisien poulitico o lei divisien religiuso nous regardon pas e que durbèn nouéstei rèng en tóutei leis amaire sincère de noueste sòu, an bèn vougu douna 'n eisèmples d'indèpendènci que malurousamen es pas toujours segui.

Gramaci dounc à noueste fraire de Roco-Vairo d'agué vougu nous ounoura de sa presènci dins noueste acamp freirenau e d'agué permés à noueste egrègi ami, lou majourau Don Savié de Fourviero, — que salùdi tambèn, — de nous faire entendre au-jour-d'uei soun elouquènto paraulo.